

# INUIT ATAQATIGIIT

## INATSISARTUNI



Nuuk, 15. juli 2013

Inatsisartut Suleriaasianni § 37 naapertorlugu Naalakkersuisunut imaattunik apeqquteqarpunga.

(Inatsisartuni ilaasortaq Naaja H. Nathanielsen, Inuit Ataqatigiit)

### Apeqqutit:

- 1. Uranimik pīaaṅgilluinnarnissamik aalajangiussap atorunnaarsinneqarnissanut atasumik Kalaallit Nunaata kiisalu Qallunaat Nunaata akornanni sillimaniarnikkut politikikkut qanoq inissimasoqalernissaa eqqarsaatigalugu Naalakkersuisut paasissutisseeqquneqarput.**
- 2. Assortuuttoqalissagaluarpat Qallunaat Nunaata (apeqqut 1 malillugu), tungaviatigut Kalaallit Nunaata atortussianik radiop qinngornerinik navianartortalinnik pīaasoqarnissaanik akuersinissaa pinngitsoortissinnaavaa?**
- 3. Siunissami pisortat suliffeqarfii ingerlatseqatigiiffiilluunniit suut nakkutiliisussatut pisariaqartinneqassappat aatsitassarsiortitseqatigiit atortussianik radiop qinngornerinik akulinnik qalluineq tuniniaaqqittarnerlu ingerlalerpassuk?**
- 4. Pissutsit suut sillimaffigisariaqalissappat Kalaallit Nunarput nammineq atortussianut radiop qinngornerinik akulinnut tamakkiisumik piginnittoorusulissappat, tamatumani aamma qallorneqartut ingerlatseqatigiiffinit namminersortunit pigineqaraluarpataluunniit?**
- 5. Aatsitassaqarfiit piaaffigineqartut inoqarfinnut qanoq qanitsigisassanersut pillugit maleruagassiortoqarnissaa Naalakkersuisunit pisariaqarsorineqarpa?**

### Tungavilersuut:

Inatsisartunit tamarmiusunit 2012-imi ukiakkut ataatsimiinnermi piumasarineqareersut nalunaarusiaq naammassineqareeraluartoq, Naalakkersuisut tamanna arlaleriarlutik avammut saqqummiukkumasimangilaat, takuuk oqaluuserisassani immikkoortoq 157.

Nalunaarusiaq naak naammassineqareersoq atuarneqarsinnaanngimmat paarlattuanik kisaatigissavara pissutsit makkua Inatsisartut siuliinit pingartinneqartut Naalakkersuisunit isummorsorfigineqassasut. Oqaluuserisassani immikkoortoq 157-ip Inatsisartuni oqallisigineqarnerani Inuussutissarsiornermut Ataatsimiititaliap isumaliutissiissutaannit oqaaseqatigiit uku taamaammat issuaavigissavakka:

“Ataatsimiititaliap naggaterpiaatigut oqaatigissavaa atortussiassat uranitallit piiarneqarnissaanik siunissami qanoq aalajangiisoqarnissaa apeqqutaatinnagu, taava aalajangiineq tamanna tungavilersorluakkamik qulaajaalluareerlunilu kiisalu Inatsisartuni aalajangiisussat innuttaasullu akornanni oqallinnissamut piffissaqarluareerluni pisariaqarmat.”

Qinnutigissavara apeqqutit tamarmik ullut sulliviit qulit ingerlanerini akineqassasut.